

Aruba tin su lider nobo



ORANJESTAD (AAN):

Den un entrevista teni e siman aki cu Comision Pro-Danny, nan a indica na DIARIO cu ta lamentable y hopi tristo pa mira con Pueblo di Aruba a worde maltrata, negligia y abandona completamente pa nos propio gobernantenan y politiconan. E interes pa soluciona problemanan existente y generalmente cu nos Pueblo ta encontrando aden y keto bay ta confrontando, ta na segundo lugar.


No ta importa cu nos Pueblo ta gritando pa auxilio y cada dia ta sufriendo mas y mas, y cu mas pronto cu ta posibel kier mira un cambio den mayoria di aspectonan. Interes personal ta ariba interes general.

Lamentablemente Aruba ta dispone di politiconan egoista cu solamente ta preocupa pa nan propio interes y e bienestar directo di nan partido politico. Gobernantenan cu ta goberna cu porta cera sin importa kico ta biba den nos Pueblo.

Nos Pueblo ta pasando den un epoca masha dificil mes. Hopi di nos propio hendenan

mes, no por cumpli cu nan obligacionnan di tur luna. Cuanto casnan humilde ta sin awa y corriente, pasobra nos criaturanan tin di come. Tur esakinan ta pruebanan concreto cu diferente gobierno (AVP y MEP) solamente a preocupa pa nan propio interes. E placa cu Pais Aruba ta produci, envez di invertie den nos Pueblo, na unda por subi e minimo loon, baha e corriente y awa cu ta matando nos Pueblo, baha huurnan di e cas di Pueblonan, no laga nos pensionadonan paga belasting, etc., ta worde inverti solamente den nan propio famianan y compinchinan.

Segun Comision Pro-Danny, ta un grupito chikito di probechadornan solamente ta probecha cu e rikeza (e placa) di Pueblo. Pa e motibo aki preciso, nos Pueblo lo keda sufri, si no bin un cambio radical mas pronto posibel.



"Nos Pueblo un tempo tabata dispone di un Lider cu realmente tabata tin nos Pueblo na pecho. Un gran estadista cu tabata sabi di unifica y guia nos Pueblo. Bou e liderato di Sr. Betico Croes en feliz memoria nos Pueblo tabata sintie honra y protegi. E atencion cu e Lider grandi aki, tabata tin pa su Pueblo, tabata inmensamente grandi y inolvidable. Pa e motibo aki preciso, keto bay Aruba ta yore y ta sclamando pa un lider nobo.

Awe cu hopi alegria y

emocion nos ta participa cu hopi honra na henter nos Pueblo di Aruba, cu Aruba un biaha mas ta dispone di un Lider, pa sali na Aruba su interes y vanguardia. No un simpel Lider pa un partido politico, pero pa henter nos culto y digno Pueblo di Aruba.

Dia 19 di juni 2005 ariba dia di tata, Sr. Glenbert Croes a priminti den presencia di Sr. Danny van der Linde, na graf di su defunto tata, Sr Betico Croes en feliz memoria, di tuma e Lucha di su Pueblo na su encargo y lo sali na vanguardia y no lo importe e sacrificionan involvi cune. Sr. Glenbert Croes decidido y cu un vos hopi motiva a expresa: "Papi bo deseonan finalmente a worde cumpli. Mi ta coi e Bandera y sigui cu e Lucha. Nos Pueblo a sufri bastante caba, pa falta di Liderato".

Hopi conmovi y decidido nos futuro Lider di Aruba a

bandona e graf di su estimado tata y a participa cu lagrima den su wowo, cu Aruba tin su Lider nobo. Sr. Danny van der Linde a priminti nos Lider-nobo di Aruba, di lucha fielmente, schouder cu schouder manera semper famianan di Sr. van der Linde a haci den pasado hunto cu Sr. Betico Croes en feliz memoria y cu lo vence tur obstaculo alguno, pa asina logra un biaha mas e felicidad di nos Pueblo di Aruba tan anhela.

Nos por a constata un Glenbert Croes totalmente madura y decidido pa guia y lidera nos Pais.

Pa e motibo aki, nos comision, convicentemente ta haci un suplica na tur Co-fundadornan, Presidente y Lidernan di Barrio di e partido, awe desconoci MEP, siguidornan y votadornan di Sr. Betico Croes en feliz memoria, pa respalda cu tur confianza nos Lider nobo di Aruba Sr. Glenbert Croes.

Sr. Danny van der Linde ta sigura nos Pueblo di Aruba, cu bou e Liderasco di Sr. Glenbert Croes, nos Pueblo lo worde unifica un biaha mas y lo reina e merecido tranquilidad, harmonia y prosperidad den henter nos comunidad.

PA VOTO SI NOS TA CONTA!!



LAS AMERICAS

(Near Burger King)
Playa (Caya Grandi)
Tel: 582-1576



Maleta cuminsando
for di Afl. 25,=